

No Servus, Diener und Habe die Ehre!

Etze kummt dos

Nej su wos

vu Sömde, n 21. Oktoubr 2023



O. Michael Siegmund

Ban Zohnorzte

Zun Zohnorzte zu gieh'n kost jo moich'n urntlich lebrwindung, auss'r de Zonangst ös su gruß, doss mr nemieh drömröm kömmt und sich halt enn Termin ei dr Praxis gahn läßt. Heutzutage braucht mr obr gor ne gruß fertrhoftscheit zu sein, denn dank Buhrer mit Woss'r und Betäubungsspritze ös de Plombiererei und sugor dos Zohnziehn eigentlich kejne gruße Affaire mieh.

Dos wor ann fuchtschr Juhn vun letztn Juhrhundert ei mann'r Kindhejt noch ganz andersch, dou wor mr fruh, wemmr noch ane Weile an Wortezömm'r sitzn dorfte und ne glei ols Erschtr dro wor.

Sannrzeit ging ich zun Feix-Zohnorz't ei Behandlung und dou gobs noch kenn Buhrer mit Woss'r und ou ane Sprötze krichte mr ocke, wenn wörklich a Zohn gezouhn wardn mußte. Dou hieß es schun topfr sein und de restlich'n Zähne feste zommebeissn, wenn Feix'n mit sann'r Orbeit luslehte.

Ofte sein vur lauter Wiehtot a poor Trä'n'l gerollt, obr dr Zohnorz't redte beruhichnd uf enn ei, su doss mr de Prozedur iehr sich drgiehn ließ bis a fertsch wor und mr endlich ausspüln dorfte.

De Besundrhejt ban Feix-Zohnorz't wor obr noch ane ganz andere. Ha wor nemlich nabn senn Beruf ols Dentist ou noch Kommandant vu dr Neugablunz'r Feuerwehr. De Feuerwache wor ock dreisch Mettr vu dr Praxis beziehungsweise vu senn Wouhnhaue weg. Dou konntes vierkumm, doss de Alarmsirene lusging, und Feix'n mußte senn Patientn, dan a grode ei dr Packe hotte, nutdirftich vrsorgn und Hols iehr Koup zun Eisotze niebrloufn.

Mier ös dos ou amoul possiert, doss ha mitt'n ei dr Behandlung drvoumachte. Dou soß ich fost ane Stunde mit enn ufgebuhrtn Zohne ufn Stuhle, bis es drnouern wattrging. Sötte Geschicht'n gibts mrscheints heutzutage nemieh; suwos mußte drlabt hon !

Wor mr dann mit dr Behandlung om Ende und hotte ols Kind trotz ejsnr Schmarzn ock wing genotschert, gobs os Belouhnung vun Feix-Zohnorzte zahn Pfennige fr a „Eisl“, will hejssn, mr konnte sich bei dr Konditorei Friedrich om Morchte ane Kugl Eis ei dr Wofflitte hulln. Doudrmitte hotte Feix'n suzusohn zwej Fliegn mit enner Kloppe drschloun: Orschtns wor dr Patiente fruh, doss ar frsch Mutichsein a Loub gekricht hotte. Und zwejtns wor dorch dan Vrkehr vu dan Eise schunn dr nächste Kariesbefoll vurprogrammiert. Sumit wor de Wattrbehandlung des potentiell'n Kundn ou fr de Zukunft gesöchert, denn de neuen Lechr an Zohne mußn jo ei Bälde wieder ei Ornung gebrocht wardn. Uf ane sötte Geschäftsidee muß mr orscht amoul kumm!

Mejntr ne ou ?
